

BATASUNAREN LEGEZ KANPORATZEA. Batasunaren jardueren etetea berresten duen Garzonen bigarren autoa aztertu zuen atzo Legebiltzarreko Mahaiak. Sozialista Abertzaleak taldea ez desagitea eta zerbitzu juridikoei txostena eskatzea erabaki du.

Eusko Legebiltzarrak ez du onartu Sozialista Abertzaleak taldea desagitea

Mahaiak Garzonen autoen inguruko txostena egiteko eskatu die Legebiltzarreko zerbitzu juridikoei

Eduarne Begiristain | GASTEIZ

Baltasar Garzon epailearen azken bi autoek Araba, Gipuzkoa eta Bizkaiko Sozialista Abertzaleak taldean duten eragina aztertzeke agindua eman die Eusko Legebiltzarreko Mahaiak ganberako zerbitzu juridikoei. Gauzak hala, Legebiltzarrak ez du Sozialista Abertzaleen jarduera behin-behinekotz eten, eta taldearen inguruan hartu beharreko erabakia datorren asteartean hartuko du Mahaiak, zerbitzu juridikoen txostena aztertu eta gero.

Modu horretan, Eusko Legebiltzarrak atzera bota du Sozialista Abertzaleak taldea desagiteko PPK egindako eskaera, ez baita «bidezkoa» izan, eta hala-ko erabakirik hartzeko «argudio nahikorik» ez dagoelako, Juan Maria Atutxa Legebiltzarreko presidenteak atzo esan zuenez. Mahaiak atzo egindako bileran, PPren eskaeraren aurka azaldu ziren EAJ, EA eta EB-IU, eta PSE-EE abstenitu egin zen.

Legebiltzarrak Garzonen auto berria jaso du jada

Era berean, Atutxak jakitera eman zuen Gasteizko Legebiltzarrak Garzonen auto berria jaso zuela astelehen arratsaldean. Auto berri horretan, jardueren etetea agindu, eta abuztuaren 26an kaleratutako autoaz azalpenak ematen ditu Garzonek. Batasunaren jardueren eteteak Sozialista Abertzaleak eta Nafarroako Ezker Independentista taldeei ere eragiten diela azaltzen du, eta erabaki horren aurka Batasunak jarritako helegitea atzera botatzen du.

Epaileak dio instituzioek «derriogorrez» bete behar dutela ebazpen judiziala, nahiz eta erakundeen esku uzten duen erabakitzea nola bete epailearen agindua. Hala ere, autoak dio neurriek ez dutela eraginik izango norbanako gisa EAEko eta Nafarroako Legebiltzarretan, Batzar Nagusietan eta udaletan aritzen diren hautetsiengan, eta jarduera horiengatik jasotzen duten soldata edo dietengan.



DAVID AGUILAR / EFE

Juan Maria Atutxa Eusko Legebiltzarreko lehendakaria eta Carmelo Barrio PPko legebiltzarkidea, atzo.

NAFARROAKO LEGEBILTZARRA

Sanzek «sinesgarritasuna kendu» dio Barrenari

Erredakzioa / Iruñea.- Fernando Barrena Nafarroako legebiltzarkideak Batasunaren jarduera aldi baterako altxatzea eskatu izanak «sinesgarritasun gutxi» duela esan zuen Miguel Sanz Nafarroako presidenteak, atzo. Ezker abertzaleko parlamentariak Iruñeko Auzitegian egindako eskaeraz «erabaki beharrekoa epaileek erabakiko dutela» esan zuen Sanzek. Barrenak eskatu du Garzonek agindutako baliogabetzea behin-behinekoz altxatzeko, horrela bakarrik aukeratu ahal izanzen duelako Batasunaren defentsa. Nolanahi ere, Nafarroako lehendakariak azpimarratu zuen «froga ziurrak» daudela Batasunaren eta ETaren arteko «loturari» buruz. «Batasuna ETari lotua egon da. Haren konpartsa izan da, eta estaldura politikoa eman dio ETari», adierazi zuen Sanzek.

Bortizkeriaren aurkako borrokan irailaren 11ko gertakariak «erabakigarriak» izan direla ere nabarmendu zuen. «Terrorismoak edozein gizartetan eragiten duen arazoaz gain, herri orori eragiten dien afera dela ohartzeko balio izan zuten gertakari haiek», esan zuen. Lehendakariaren aburuz, aipatu gertakariak balio izan zuten Europako Batasuna bortizkeriak ekar ditzakeen kalteez ohartzeko. Are gehiago: Sanzen hitzetan, Espainiak «ETaren terrorismoarekin bukatzeko bide egokia bilatzeko balio izan du» irailaren 11ko gertaerak.

Gauzak hala, Garzoni lehengo autoari buruz azalpenak eskatzeko PSE-EEk Mahaiari egindako proposamena kentzea erabaki zuten atzo arratsaldean sozialistek. Rodolfo Ares PSE-EEko bozeramaileak azaldu zuenez, bigarren autoa «sakon» aztertu ostean hartu dute

erabakia, Mahaiak goizean egindako bileran ebazpen berria irakurtzeko betarik ez zutelako izan. Aresen ustez, Garzonen ebazpen berria «oso argia eta zehatza da», eta, ondorioz, Legebiltzarrak «lehenbailehen» bete behar ditu epailearen aginduak, eta talde parlamentarioa-

ren jarduera eten. Aresen ustez, gainera, Garzonen erabakia eta legez kanporatze prozesua «ez doa ideien kontra, jarreraren aurka baizik».

Bestalde, EAKo ordezkari Gorka Knörrek iritzi zion ez dela «bidezkoa» Sozialista Abertzaleak taldearen jarduna

eteteke PPK egindako eskaera. «Legebiltzar honek bere araudia, legeak eta burujabetza defendatu behar ditu, eta ez ditu inoren menpe jarri behar», azaldu zuen.

PPko legebiltzarkide Carmelo Barriok, berriz, «tamalgarria» iritzi zion Mahaiaren erabakiari. Bere irudiko, Garzonen ebazpenari kasu eginez, «argi eta garbi» dago Legebiltzarrak Batasunaren legebiltzar taldea desegin behar duela. «Aukera eta bete-behar bat pasatzen» utzi dela adierazi zuen Barriok.

Alderdien Legearen aurkako helegitea

Bestalde, Legebiltzarreko Mahaiak premiazko prozeduraz onartu du EAEko Legebiltzarrak Alderdien Legearen aurka helegitea jartzeko EAJk eta EAK aurkeztutako legez besteko proposamena. Atutxak atzo jakitera eman zuenez, ekimen hori ziurrenik ostiral honetan eztabaidatuko da, Instituzio eta Barne Saileko Batzordean.

ESANAK

JUAN MARIA ATUTXA
(Eusko Legebiltzarreko presidentea)

«Sozialista Abertzaleak taldea desagiteko argudio nahikorik ez dago»

RODOLFO ARES
(PSE-EEko legebiltzarkidea)

«Autoa oso argia da, eta Legebiltzarrak lehenbailehen bete behar du»

GORKA KNÖRR
(EAKo legebiltzarkidea)

«Legebiltzarrak ez du bere araudia inoren menpe jarri behar»